

18 NOV 1999

NUPW MINTA HARI PENGUNDIAN DISYTIHAR CUTI UMUM

KUALA LUMPUR, 18 Nov (Bernama) -- Kesatuan Kebangsaan Pekerja Ladang (NUPW) telah menggesa kerajaan supaya mengisytiharkan hari pengundian bagi pilihan raya umum ke-10 pada 29 Nov ini sebagai cuti umum.

Setiausaha Agungnya, G.Sankaran, berkata kesatuan itu telah menghantar surat kepada Perdana Menteri Datuk Seri Dr Mahathir Mohamad dan Menteri Sumber Manusia Datuk Lim Ah Lek, mengenai perkara itu tiga hari lepas.

"Pekerja ladang secara tradisinya memberi undi mereka kepada Barisan Nasional. Kami harap mereka akan dapat menyatakan hasrat mereka itu sekali lagi dengan lebih lancar pada pilihan raya ini," katanya.

Sankaran berkata pekerja ladang yang dibayar gaji mengikut kadar harian akan menghadapi masalah untuk pergi mengundi jika mereka tidak diberi cuti pada hari pengundian itu.

"Jika ia bukan cuti umum, pekerja itu terpaksa pergi bekerja pada sebelah pagi dan mungkin terlepas peluang untuk pergi mengundi pada sebelah petang jika hujan lebat," katanya.

NUPW, kesatuan tunggal bagi pekerja ladang di negara ini, mewakili kepentingan 250,000 pekerja.

-- BERNAMA
RV RM NMO